

MARTINI BECANI

Theologi Moguntini.

AD

FRIDERICVM
BALDVINVM

Theologum VVittenbergensem.

De


Communione sub vtraq; specie:
EPISTOLA.



MOGUNTINAE,

Typis IOANNIS ALBINI.

ANNO M. DC. X. +





MARTINVS BECANVS.

FRIDERICO BAL-

D V I N O.

S. D.

P Rouocas me ad scribendum Balduine : vel, vt planius dicam, ad litigandum Ægrè adducor, vt faciam. Et duplex mihi causa. Vna, quod aliis scriptionibus sim occupatissimus. Altera, quod Caluinistas hactenus, non Lutheranos, ex quorum numero tu es, hostes mihi & aduersarios delegerim. Sed, quia sponte me laceffis, quid faciam? En sisto me, & ad pugnam capeffendam præsto sum. Et ne longè abeamus; hoc agitur inter nos, an communio sub vtraq; specie sit in præcepto diuino, nec ne? Ego in mea Disputatione, quam pridem de hoc argumento scripsi, contendo non esse. Tu in tuis Notis, quas in eandem Disputationem meditatus es, contrarium asseris.

Vter rectius, in controuersiam nunc venit. De iudice, qui litem hanc dirimat, non facile inter nos conueniet. Tu enim, fat scio, non alium, nisi te ipsum, vel certè sacram Scripturam tuo sensu intellectam, admissurus es. Igitur arbitros designemus, necesse est. Nec abnuo, quin omnes, quotquot lecturi sunt, ex arbitrio sententiam dicant.

II. Longiori præfatione opus non est. Ad rem venio. Negavi communionem sub vtraq; specie, diuino præcepto, omnibus necessariam esse. Et confirmaui hoc ordine ac methodo. 1. aliud est institutio diuina; aliud præceptum diuinum. 2. Christus instituit communionem sub vtraq; specie; non tamen præcepit omnibus vsum vtriusque speciei. 3. Imo vsum vnius speciei, tum verbo, tum facto, ipse comprobauit. Verbo quidem, Ioan. 6. Facto autem, in Emaus. 4. Quod etiam fecerunt Apostoli, vt ex actibus illorum perspicuum est. 5. Et post Apostolos, primitiua Ecclesia, tam orientalis, quam occidentalis. 6. Et rectè ab iis factum. Nam sub vna specie non minus continetur totus Christus, quàm sub vtraq; 7. Nec minor fructus

fructus percipitur ex vnâ, quam ex vtrâq; cæteris paribus. 8. Et aliunde possunt esse legitimæ causæ, cur potius sub vna, quàm sub vtrâq; communicent Laici. Propter quas etiam statutum est ab Ecclesia, vt sub vna deinceps communicarent. 9. Nec aduersarii quicquam obiiciunt, quod dilui commodè non possit. Hæc ego.

III. Quid tu verò, Balduino? Primum ais, omnia argumenta, quæ à me allata sunt, pridem solidissimè refutata esse à Ioanne Husso. Deinde, tuam etiam refutationem attexis. Cuius hæc ferè capita seu fundamenta sunt. 1. contendis, omnem institutionem diuinam continere præceptum. 2. ac proinde, sicut Christus instituit communionem sub vtrâq; specie, ita etiam præcepisse. 3. Negas Christum in Emaus vnâ speciem suo facto comprobasse. 4. Negas Apostolos id fecisse. 5. Et, si Ecclesia primitiua id fecisset, ais te non sequi Ecclesiam, sed Christum. 6. Addis, totum Christum contineri quidem sub vna specie personaliter, non tamen sacramentaliter. 7. Et maiorem fructum percipi ex vtrâq; specie, quàm ex vna. 8. Nec aliunde esse causas, cur sub vna potius,

quàm

quam sub vtraq; communicādum sit. 9. Et hoc efficaciter probari ex illis verbis, *Hoc facite, Comedite, Bibite*. Hæc ferè, quæ directè ad rem pertinent.

4. Addis multa alia, ex quibus ea, quæ sequuntur. 1. Christum secundum humanitatem esse vbique. 2. Christi benedictionem non semper fuisse efficacem. 3. Paulum Apostolum in tertio cælo audiuisse verba institutionis Eucharistiæ. 4. antiquos Patres, & nominatim Cyprianum non agnouisse mutationem substantiæ panis, quam vocamus Transubstantiationem. 5. Eucharistiam non esse Sacramentum extra vsum. 6. Ministros non debere sumere Eucharistiam, sed tantum aliis porrigere, sicut Christus fecit. 7. falsum esse, quod Christus porrexerit Eucharistiam post lotionem pedum. 8. hoc sacramento, non modo animam, sed & corpus refici. 9. Abstemios posse quidem communicare sub vna specie; suadendum tamen iis esse, vt integrè abstineant.

5. Omitto conuitia, quæ passim inspergis; quanquam in hoc genere modestiores, quàm pleriq; alii Lutherani in Saxonia. Omitto inepta & frigida argumenta, quæ
tibi

tibi familiaria sunt. Et cùm illa defunty, nuda verborum assertione, mea refellis, tua astruis. Deniq; non rarò, cùm aliud non occurrit, ad conscientias tenerorum, quas tranquillare videri vis, importunè prouocas: præsertim, quando firmioribus argumentis vrgeri te sentis. Tunc enim, responsionis loco, identidem inculcas illud; *Non satisfit conscientis tenerorum. Ad conscientias tenerorum appello.* Cum tamen, nesciam, quos intelligas nomine tenerorum, qui tam delicatas habent conscientias. Catholicos certè non intelligis. Nam illorum conscientis abundè fit satis per vnus speciei sumptionem, vt experientia testis est. Nec Caluinistas, opinor. Hi enim, non delicati ac teneri, sed sacrilegi vobis in hoc sacramento sunt. An ergo Lutheranos? At illorum conscientia tranquillatur ex illo Lutheri Euangelio; *Sola fides iustificat.* Et, *nullo opere, nulla lege, Christiano homini opus est, cum perfidem liber sit ab omni lege.* Quid ergo Lutherani curent legem de vtraque specie?

6. Hæc obiter, Balduine, ex tuis Notis. Vt singula & omnia refellantur, nihil

neceſſe eſt. Nam pleraq; , aut nullius , aut parui admodum momenti ſunt. Et legiſſe , pene refutaſſe eſt. Accedit anguſtia temporis , qua premor. Vix pauci dies ſuperſunt ad Nundinas ; & iam primùm à ſideli amico libellum tuum naſtus ſum. Vellem autem , vt iisdem Nundinis , quibus lucem aſpecturus eſt , mea quoq; refutatione inclareſcat. Ergo , omiſſis aliis , hæc pauca capita excutienda ſunt.

1. *De Ioanne Huſſo.*
2. *De Vbiquitate Chriſti.*
3. *An omnis inſtitutio diuina contineat præceptum?*
4. *An debeamus Chriſtum ſequi , non Eccleſiam?*
5. *An Chriſti benedictio ſemper fuerit effi-
cax?*
6. *An Paulus Apoſtclus in tertio celo audine-
uerit verba inſtitutionis?*
7. *An Patres agnouerint Tranſubſtantia-
tionem?*
8. *An Miniſtri debeant tantum porrigere ,
non autem ſumere Euchariftiam?*
9. *An Chriſtus porrexerit Euchariftiam an-
te , vel poſt lotionem pedum?*

10. *An hoc Sacramento, non tantum anima, sed & corpus reficiatur?*
 11. *An abstemij sub vna specie possint communicare?*

Hæc pauca, inquam, hoc tempore. Si alias oportunum erit, fusius tecum agere paratus sum. Quanquam, quid dico, fusius? Nihil opus, nisi alia, quæ maioris ponderis sint, à te adferantur. Nunc ergo ad rem.

CAPVT I.

De Joanne Husso.

I. **I**N Præfatione ad Lectorem, ais, omnia mea argumenta, antè duo ferè sæcula, solidissimè refutata esse à Ioanne Husso. Verbatua sunt hæc; *Ioannis Husfi Constantissimi Martyris confessionem in hoc frontispicio annotare placet, ex qua liquido constabit, Becanum ea ferè omnia in hac sua Disputatione, quasi data opera, corrarisse, quæ iam antè duo ferè sæcula solidissimè fuere refutata.*

2. Sed duo hic occurrunt, quæ velim mihi explices. Vnum est, si Ioannes Hussus ante duo sæcula *solidissimè* refutaui

mea argumenta, vt tu asseris; quid necesse erat, te ijsdem refutandis operam perdere? Vel tu melius id præstas, quam ille, vel deterius. Si tu melius, quomodo ille *solidissimè*? Si deterius, in quem finem? an vt despici & rideri possis? Hoc alia via poteras assequi. Addo refutationem Hussi, vt à te quidem transcripta est, breuissimam esse: tuam multo verbosiores. Quid ergo Lectori molestus es, obtrudendo verbosam & inanem, qui breuissima & solidissima contentissimus esse potest?

3. Alterum est, si Hussus, quem Germaniæ Cyprianum vocas, *solidissimè* omnia scripsit de Communionem sub vtrâq; specie: cur postea in progressu ais, errasse illum, quod caput 6. Ioannis, de sacramentali manducatione interpretatus sit? Certe, si tibi errauit, vbi posuit fundamentum Communionis sub vtrâq; specie: non potuit ex illo fundamento *solidissimè* omnia refutare. Nisi apud vos Lutheranos, etiam ex falsis principiis, *solidissima* veritatis assertio procudi possit: quod tibi æstimandum relinquo.

CAPVT II.

De Vbiquitate Christi.

1. **D**Ixeram in mea Disputatione, vos Lutheranos (cùm obiicitis nobis, quod Laicos fraudemus dimidia parte Christi, exhibendo illis carnem sine sanguine) necessario supponere, Christum mortuum esse in sacramēto: quod sic probaui. Illi censent Christum esse mortuum, qui putant sub specie panis dimidiū Christum, & sub specie vini reliquam eius partem contineri: atqui Lutherani hoc putant, quando obiicunt Catholicis, quod solam carnem Christi exhibeant laicis sub specie panis: Ergo Lutherani censent Christum esse mortuum in Sacramento: quod est absurdum.

2. Vt elueres hanc maculam, Balduine, nouis laqueis te implicuisti. Nam pag. 12. sic respondes: *Distingue inter naturalem corporis Christi existentiam, & sacramentalem. Secundum illam sanè, ubi est Christus, ibi totus est: secundum hanc autem manifesta est institutio Christi, quæ cum symbolo panis, corpus: cum symbolo vini, sanguinem unitum esse, ac distribui*

distribui docet. Quae de re plura suo loco. Hoc dicis, opinor, Christum totum esse sub vna specie per existentiam naturalem; non tamen totum per existentiam sacramentalem. Et remittis nos ad alium locum, ubi plura te dicturum de hac re polliceris. Id praestas pag. 27. his verbis; Libenter concedimus, Christum non minus sub vno symbolo, quam sub duobus praesentem esse in sacramento; sed non sacramentali praesentia adest, verum personali, secundum quam. ut Deus & homo nullibi inclusus, nullibi exclusus est. Hic igitur distinguis duplicem praesentiam: vnam personalem, qua Christus ubiq; est; alteram sacramentalem, qua in solo sacramento est, non tamen totus sub vna specie.

3. Nunc quaero, an utroq; loco idem dicas, an diuersum? In priori distinguis inter existentiam naturalem & sacramentalem: In posteriori, inter personalem & sacramentalem. De sacramentali, quae utroq; loco ponitur, non laboro. An naturalis & personalis, idem tibi sint, an diuersum, hoc quaero. Si diuersum; non cohæret doctrina tua. Nec rectè ex vno loco ad alterum nos remittis. Si idem; cur postea distinguis
inter

inter personalem & naturalem? Sic enim habes pag. 148 *Distinguendum est inter ista tria; inter præsentiam Christi personalem, naturalem & sacramentalem. Illâ nusquam est exclusus: istâ, corpus & anima in Christo semper sunt coniuncta, extra mortem: hac, in sacramento tantum coniuncta sunt.*

4. Hic primùm miror tuam inconstantiam. Tribus locis, ter mutasti. Primo loco agnoscis naturalem & sacramentalem, præsentiam: Secundo, personalem & sacramentalem: Tertio, personalem, naturalem & sacramentalem. Sed sine dubio, posteriores cogitationes sunt meliores prioribus. Accipiamus ergo, quod ultimo loco dixisti, tres esse præsentias Christi, personalem, naturalem, & sacramentalem. Quâ verò vocas personalem? Eam, inquis, qua Christus, etiam secundum humanitatem, ubiq; est, & nullibi exclusus. Valdè dubito, an satis ipse intelligas, quid velis. Nam hoc monstrum Ubiquitatis ita varium ac impenetrabile est, ut non solum omnes Catholici & Calvinistæ, sed pleriq; etiam Lutherani fateantur se assequi non posse. Tu tamen, quia aliter à morte Christum vindicare non potes, ad hoc asylum ex desperatione

ratione, confugisti. Sed dic fodes, quomodo intelligis hanc propositionem: *Christus per præsentiam personalem est ubiq;?* Vis hoc solum dicere, personam Christi ubique esse? Rectè quidem: sed nihil ad rem. An hoc etiam, humanitatem Christi esse ubique? Nisi hoc dicas, nihil dicis. Et tamen, si hoc dicis, planè non intelligis, quid dicas. Nam si humanitas Christi, ubique est: per quid quæso, ubique est? per præsentiam, inquis, personalem. Sed persona Christi, seu verbi, per quid ubiq; est? Sine dubio, per immensitatem. At Immensitas est attributum essentialè, & commune toti Trinitati. Sicut enim Æternitas, & Omnipotentia: sic etiam Immensitas tribus personis communis est. Hoc patet ex Symbolo Athanasij, quod sic habet: *Immensus Pater, immensus Filius, immensus Spiritus sanctus. Æternus Pater, æternus Filius, æternus Spiritus sanctus. Et tamen non tres æterni, sed unus æternus: sicut non tres immensi, sed unus immensus. Similiter, omnipotens Pater, omnipotens Filius, omnipotens Spiritus sanctus. Et tamen non tres omnipotentes, sed unus omnipotens.* Hic vides, Balduine, Immensitatem, qua Deus ubiq; est: Æternitatem,

tatem, qua semper est: & omnipotentiam, qua omnia operatur: esse tria attributa, quæ toti Trinitati communia sunt. Sicut ergo Pater, Filius, & Spiritus sanctus, sunt æterni & omnipotentes per vnā numero æternitatem & omnipotentiam: sic etiam sunt vbiq; per vnā numero immensitatem. Si ergo humanitas Christi per eandem Immensitatem vbiq; est, necessario sequitur, per eandem quoq; æternitatem, æternam esse: & per eandem omnipotentiam, omnipotentem: & sic de aliis attributis essentialibus. Omnia enim sunt vna & indiuisibilis entitas, in qua nulla multitudo, nulla distinctio, (exceptis relationib.) locum habet. Hic vide, quid respondeas.

5. Quod addis de præsentia naturali & sacramentali, non satis intelligo. Vel idem dicis, quod nos, vel diuersum. Si idem, quid litigas? Si diuersum, explica te. Nos dicimus, vi sacramenti, seu vi istorum verborum, *Hoc est corpus meum*, solum corpus Christi præsens esse sub specie panis: sanguinem verò, & animam rationalem, per naturalem concomitantiam. Cùm enim corpus illud viuum sit, naturaliter debet esse coniunctum cum
sanguine

sanguine & anima rationali. Tu dicis, per existentiam *sacramentalem*, solum corpus Christi præsens esse sub spècie panis; & reliqua, per *naturalem*. Quid hic differs à nobis, nisi forte verbis? Nam, quod nos dicimus, *vi sacramenti*, adesse; hoc tu dicis, per *sacramentalem existentiam*, adesse. Et rursum, quod nos dicimus, per *naturalem concomitantiam*, hoc tu vocas *naturalem existentiam*. Si ita est, quid verbo negas, quod re ipsa admittis? Sin secus, cur non disertè te explicas?

C A P V T III.

An omnis institutio diuina contineat præceptum?

I. **T**V affirmas, pag. 19. his verbis; *Dico omnem institutionem DEI includere præceptum, quo obligantur ij, in quorum gratiam aliquid instituitur.* Hic quæro, in quorum gratiam institutum sit matrimonium? An tantum in eorum, qui reuera matrimonium ineunt? Hoc non dixeris. Alioqui, qui cœlibatum seruant, ex diuina institutione exclusi essent à matrimonio: & conse-

consequenter, si omnis institutio includeret præceptum, vt tu vis, etiam diuino præcepto à nuptijs arcerentur; quod sanè falsum est. Si ergo in gratiam omnium hominum, cum adoleuerint, institutum à Deo matrimonium est (nemo enim vi institutionis excluditur) necesse erit ex tua doctrina; omnes homines diuino præcepto obligari ad matrimonium. At hoc est contra Apostolum; 1. Corinth. 7. 8. *Dico autem non nuptis & viduis, bonum est illis, si sic permaneant.* q. d. bonum est; vt non nuptæ, permaneant non nuptæ; & vt viduæ, permaneant viduæ. Non ergo præceptum diuinum est, vt non nuptæ, matrimonium ineant.

2. Addis pag. 18. hunc syllogismum; *Pro quibus totum sacramentum Cœnæ fuit institutum, ijs etiam præcepta est totius sacramenti usurpatio. Pro omnibus Ecclesiæ ciuibus sacramentum totum fuit institutum: Ergo eius usurpatio omnibus Ecclesiæ ciuibus præcepta fuit.* Ego in simili forma; hunc tibi regero; *Pro quibus matrimonium fuit institutum; iis etiam præcepta est matrimonij usurpatio. Pro omnibus Ecclesiæ ciuibus matrimonium fuit institutum: Ergo*

eius vsurpatio omnibus Ecclesiæ ciuibus præcepta fuit. Admittis hoc Balduine? Vide, quid dicas. Alioqui fatendum tibi erit, eos non fuisse Ecclesiæ ciues, qui matrimonium non vsurparunt; inter quos fuit Apostolus Paulus, qui de seipso dixit, 1. Corinthior. 7. vers. 7. *Volo omnes homines esse, sicut meipsum: sed unusquisque proprium donum habet ex Deo; alius quidem sic, alius verò sic.*

3. Iam illa conclusio tui syllogismi (*Ergo totius Sacramenti vsurpatio omnibus Ecclesiæ ciuibus præcepta fuit*) quomodo consistit cum eo, quod alibi dicis, Ministros Ecclesiæ non debere vsurpare sacramentum Eucharistiæ, sed aliis duntaxat distribuere? Si enim, ex tua sententia, vsurpare Sacramentum non debent; sanè, vel Ecclesiæ ciues non sunt; vel si sunt, falsum est, quod concludis, omnes Ecclesiæ ciues præcepto teneri ad totius Sacramenti vsurpationem. Sed

de hoc iterum,

cap. 8.

CAPVT IV.

*An debeamus Christum sequi,
non Ecclesiam?*

I. **N**OS quidem, & Christum sequi volumus, qui de seipso dixit; *Ego sum via, veritas & vita*: Et similiter sponsam eius Ecclesiam, de qua idem dixit; *Qui Ecclesiam non audierit, sit tibi sicut Ethnicus, & publicanus*. At tu, Balduine, nescio quo spiritu impulsus, aliter sentis. Ais enim pagin. 92. *Non sequimur Ecclesiam, sed Christum*. Perinde, ac si dicas; Non sequimur sponsam, sed sponsum. An nescis, Christum & Ecclesiam indissolubili vinculo coniunctos esse? Audi Apostolum, Eph. 5. 3. *Relinquet homo patrem & matrem suam, & adheret uxori sue; & erunt duo in carne una*. Sacramentum hoc magnum est: Ego autem dico, in Christo & Ecclesia. An nescis, Ecclesiam fundatam esse supra firmam petram, ut labi non possit? An nescis, firmamentum esse veritatis? In ventre Ecclesie, inquit S. Augustinus, *veritas manet*. Quid ergo in mentem tibi venit;

B 2 ut pa-

ut palàm profiteri ausis, te non sequi Ecclesiam, sed Christum? Non potes sequi Christum, nisi & Ecclesiam sequaris. Hoc ipse fatetur, cùm ait; *Qui vos audit, me audit: & qui vos spernit, me spernit.*

2. Planius tecum agam. Vel putas Christi Ecclesiam errare posse in doctrina, vel non posse. Si non potest errare, cur eam sequi non vis? Si potest, vel tu in Ecclesia non es, vel similiter cum Ecclesia errare potes. Si errare cum illa potes; profectò, sicut illam sequi non audes, ita nec te ipsum sequi debes. Imo, nec Discipuli, quos Wittenbergæ instruis, sequi te debent. Quis enim errantem sequatur?

C A P V T V.

*An benedictio Christi fuerit
semper efficax?*

1. **E**Go in mea Disputatione asserui; sed cum duplici limitatione. 1. quod hoc velim intelligi de ea benedictione, cuius mentio fit in Evangelio. 2. de ea, quæ facta est circa panem. Itaq; plena mea assertio est hæc; omnem Christi benedictionem;

tionem, quam in Euangelio legitur fecisse circa panem, fuisse efficacem, & alicuius mysterij seu miraculi effectricem. Hanc sic probavi; Christus in Euangelio ter legitur benedixisse panem. Primo, in multiplicatione panum & piscium. Secundo, in vltima cœna. Tertio in Emaus. Et semper aliquid mysterij seu miraculi operatus est. Ergo omnis Christi benedictio circa panem, quam in Euangelio legimus, fuit efficax.

2. Contra hanc meam assertionem sic scribis, Balduine, pag. 64. *Nulla nos cogit evidens necessitas, ut dicamus benedictionem Christi semper importare aliquid mysterij seu miraculi. Nam Marci 10. 16. impositis manibus benedixit infantibus ad se allatis, nec quicquam secutum est vel miraculi, vel mysterij. Et benedictio panis ipsi familiaris fuit, non ex peculiari aliquo consilio, sed communi illa ratione, qua cibi omnes sanctificantur per verbum & precationem, 1. Timoth. 4. 5.*

3. Nescio, an his verbis directè velis me oppugnare; an solùm aliquid dicere. Si oppugnare vis, certè non efficis, quod conaris. Nam primò, extra rem adfers

illud de infantibus Mea enim assertio fuit hæc; benedictionem Christi *circa panem*, fuisse semper efficacem. An putas hanc enervari, si opponas, non fuisse efficacem, *circa infantes*? Ludis Balduine. Et vnde, obsecro, tibi constar, circa infantes non fuisse efficacem? *quia nihil*, inquis, *miraculi vel mysterij secutum est*. Audio. Sed quomodo id probas? Legamus Euangelium. *Tunc*, inquit Matthæus, *oblatis sunt ei paruuli, vt manus eis imponeret & oraret*. Hic primùm aduerte, quo animo parentes obtulerint Christo suos paruulos. Nempè, vt manus eis imponeret, & oraret. Et quid inde sperare poterant? Aliquid sanè. Sciebant enim, non solùm antiquos Patriarchas, eximia quædam beneficia largitos esse suis filiis ac nepotibus, per benedictionem; sed etiam Christum, qui tunc præsens aderat, præclara miracula, tum attactu manuum, tum oratione, tum aliis externis signis, in Iudæa perpetrasse. Igitur hac freti confidentia, offerebant illi paruulos, vt & illis similiter aliquid doni, seu gratiæ impartiretur. Quis autem credat, Christum orando per illis, & sacratissimas
manus

manus imponendo , parentum spem elusisse , & nihil peculiare circa paruulos operatum esse? Nemo , nisi Balduinus.

4. Iam, quod addis, *benedictionem panis fuisse Christo familiarem*; vel generatim accipis de quacunque benedictione, quam Christus adhibuit pani; & sic iterum extra scopum vagaris: vel de ea speciatim, cuius aperta sit mentio in Euangelio; & sic non rectè loqueris. Nam in Euangelio, non sæpius, quam ter, inuenio Christum benedixisse panem, vt suprà notauì. Quod autem quis legitur ter tantum fecisse, non propriè dicitur fuisse illi familiare. Alias necesse erit fateri Petro familiarem fuisse negationem Christi, quia ter Christum negauit. Similiter Paulo familiare fuisse, cœdi virgis, & naufragium pati, quia ter virgis cæsus & naufragium passus legitur. Quæ omnia absurda sunt.

5. Denique, quod annectis, *benedictionem panis*, ex communi consuetudine, non ex peculiari aliquo consilio, fuisse à Christo usurpatam; sine dubio falsum est. Vel

enim loqueris de illa sola benedictione panis, cuius sit mentio in Euangelio; vel de omni. Illud prius dici non potest, quia certum est, triplicem illam benedictionem, cuius sit mentio in Euangelio, factam esse ex peculiari consilio. Quis enim neget, Christum ex peculiari consilio benedixisse panē in solitudine, quando aliquot milia hominum satiauit? in cœna vltima, quando sacramentum instituit? in Emaus, quando Discipulorum oculos aperuit? Hinc colligo, nec posterius dici posse. Non enim potest generatim verum esse de omni benedictione, quod speciatim falsum est de aliqua: at iam ostendi falsum esse de triplici benedictione Euangelica, quod non sit facta ex peculiari aliquo consilio: Ergo etiam falsum est de benedictione generatim sumpta.

CAPVT VI.

An Paulus in tertio cœlo audiverit verba institutionis Eucharistiae?

- I. **H**OC tu affirmas Balduine, pag. 28. cum ais; *D. Paulus verba institutionis in ter-*

in tertio cælo repetita & declarata audiuit. Vis hoc dicere, verba institutionis, quæ in vltima cœna coram aliis Apostolis primùm prolata sunt; eadem in tertio coram Paulo, (qui in vltima cœna non fuerat,) repetita esse, & secundum legitimum sensum explicata. Sed vnde hoc habes, mi homo? Scribit quidem Paulus de seipso. 1. Corint. 11. 23. *Ego enim accepi à Domino, quod & tradidi vobis.* Sed non addit, se accepisse in tertio cælo. Nec verisimile est, triplici de causa. Primo, quia quæ audiuit in tertio cælo, erant arcana verba, quæ non licet homini loqui, vt ipse de se fatetur 2. Cor. 12. 4. *Raptus est in paradisum, & audiuit arcana verba, quæ non licet homini loqui.* At verba institutionis Eucharistiæ non sunt arcana, quæ non liceat homini loqui. Ergo verba institutionis Eucharistiæ, verisimile est, non audiuisse in tertio cælo.

2. Sed multo efficacius id conuincō ex his principiis. Primùm est, quod raptus Pauli in tertium cælum, contigerit multis annis post conuersionem. Nam conuersio eius (in via prope Damascum) facta est anno Domini 35. Raptus autem contigit 14. annis ante scriptam postero-

rem epistolam ad Corinthios, ut ipse fate-
 tur. 2. Corinth. 12. 2. his verbis; *Scio homi-*
nem in Christo ante annos 14. raptum usque ad
tertium celum. Porro epistola illa scripta
 est anno Domini 58. Vnde necesse est,
 raptum contigisse anno 44. ac proinde
 inter conuersionem & raptum, plusquam
 octennium intercessisse. Videri potest
 Baronius tomo 1. annalium, Serarius in
 Paulo, & alii, qui hanc rem diligenter ex-
 aminarunt. Alterum principium est, quod
 Paulus statim post conuersionem, cepe-
 rit Euangelium Christi prædicare, ut pa-
 tet Act. 9. 20. ubi statim post conuersio-
 nem, *ingressus in Synagogas, predicabat Ie-*
sum, quoniam hic est filius Dei: Et confun-
debat Iudeos, qui habitabant Damasci. Ter-
 tium est, quod Euangelium Christi, quod
 statim post conuersionem cepit prædica-
 re, non didicerit ab hominibus, sed ab
 ipso Christo, ut patet ex illo, ad Galat.
 1. 11. *Notum vobis facio Euangelium, quod*
Euangelizatum est à me, quia non secundum
hominem: neque enim ego ab homine accepi
illud, sed per reuelationem Iesu Christi. Quar-
 tum est, quod institutio Baptismi, & Eu-
 charistię, pertineat ad Euāgelium Christi;
 ac pro-

ac proinde nemo possit perfectè prædicare Euangelium Christi, nisi sufficienter instructus sit de institutione Baptismi & Eucharistiæ. Cum enim sint Sacramenta nouæ legis, seu Euangelii, eorum notitia necessaria est ad plenam notitiam nouæ legis & Euangelii.

3. Ex his principiis sic concludo, Paulus statim post conuersionem (quæ octennio præcessit raptum ipsius ad tertium cælum) missus fuit ad prædicandum Christi Euangelium, & sine dubio sufficienter instructus de iis, quæ ad illud munus requirebantur: atqui notitia institutionis Eucharistiæ requirebatur ad munus prædicandi Euangelium Christi: Ergo de illa fuit sufficienter instructus, statim post conuersionem. Ergo in raptu, qui octennio post contigit, non didicit verba institutionis, sed multo ante perspecta habuit.

4. Hoc ipsum euidenter colligitur ex illo, ad Gal. 1. 15. *Cum autē placuit ei, qui vocauit me per gratiam suam, ut reuelaret filium suum in me, ut euangelizarem illum in gentibus, continuo nō acquieui carni & sanguini, neq; ueni Ierosolymam ad antecessores meos Apostolos, sed abij*

sed abij in Arabiam, & iterum reuersus sum Damascum. Hic enim tria insinuantur, quæ ad rem nostram faciunt. 1. quod in prima conuersione, quæ contigit in via prope Damascum, reuelatus sit illi filius Dei. 2. quod in eum finem reuelatus sit, vt euangelizaret eum in gentibus. 3. quod statim profectus sit in Arabiam, vt præstaret, quod ipsi iniunctum erat. At cur non potius iuit Ierosolymam ad Petrum & Iacobum, vt ab iis instrueretur, & Iudæis, qui carne & sanguine coniuncti illi erant, Christum annuntiaret? Causa in promptu est, tum quia maiori instructione non indigebat, cum à Christo sufficienter esset edoctus; tum, quia Christus non miserat illum, vt Iudæis, sed vt gentibus Euangelium annuntiaret. Sic enim de illo loquitur ad Ananiam, Act. 9. 15. *Vas electionis est mihi iste, vt portet nomen meum coram gentibus.* Et ipse de seipso, ad Galat. 2. 7. *Credendum est mihi Euangelium præputii, sicut Petro circumcisionis. Qui enim operatus est Petro in Apostolatam circumcisionis; operatus est & mihi inter gentes.*

5. Accedit tertium argumentum; quia alii Apostoli, qui vltimæ cœnæ præsentibus inter-

interfuerant, non minus sciebant verba institutionis Eucharistiæ, quàm Paulus, qui præsens non interfuit, sed postea audiuit. At ea, quæ in tertio cælo reuelata sunt Paulo, non erant æquè aliis Apostolis perspecta. Ergo inter ea non sunt numeranda verba institutionis. Minor probatur, quia Paulus 2. Corinth. 11. & 12. conferens se cum aliis Apostolis, disertè ait, in plerisque se non esse illis inferiorem. *Existimo*, inquit, *nihil me minus fecisse à magnis Apostolis*. In multis etiam superiorem, præsertim in reuelationibus, quæ in tertio cælo, illi acciderunt. At quomodo in iis superior esset, si de institutione Eucharistiæ duntaxat, & similibus rebus fuisset ibi instructus? Hæc pauca habui, Balduine, quæ tibi opponerem. Tu, si quid validius occurrit, vicissim regere, si videbitur.

C A P V T VII.

An Patres agnouerint Transubstantiationem?

1. **T**V negas, pag. 65. his verbis; *Quod autem conuersionis aut mutationis aliquando*

quando meminerunt Patres, non intellexerunt Transselementationem, qualis in Papatu docetur, sed mutationem sacramentalem, qua elementa externa (panis & vinum) à communi & vulgari usu ad usum mysticum & sacramentalem consecrantur.

2. Duo hic dicis, ut video. 1. quod Patres, quando loquuntur de mutatione seu conuersione, quæ fit in Eucharistia, non intelligant talem mutationem, qualis in Papatu docetur. 2. quod intelligant talem, qualis in Lutheranismò defenditur. Mutatio autem, quæ in Papatu docetur, consistit in reali & substantiali conuersione, qua substantia seu natura panis mutatur in substantiam seu naturam carnis Christi. At quæ apud Lutheranos defenditur, in eo solum consistit, quod panis, retinens substantiam & naturam panis, à communi & vulgari usu transferatur ad usum mysticum & sacramentalem; sicut olim in antiquo Testamento, panes propositionis, retinebant quidem naturam & substantiam panis, sed tamen eorum usus non permittebatur passim omnibus, sed iis potissimum, qui in templo seruiebant. Et hoc solo, à laicis panibus distinguebantur.

3. Videamus nunc, de qua mutatione loquantur Patres; an de ea quam Lutherani, an potius de ea, quam nos Catholici agnoscimus & profitemur. Nec difficile erit iudicare, si verba, mentem, & scopum illorum inspiciamus. Ac primo loco occurrit Ambrosius, qui de hoc argumento ex professo scripsit in libro de his, qui mysteriis initiantur, c. 9. vbi sic habet, *For- te dicas, aliud video, quomodo tu mihi asseris, quod Christi corpus accipiam & hoc nobis adhuc superest, ut probemus, Quantis igitur utimur exemplis, ut probemus non hoc esse, quod natura formauit. sed quod benedictio consecrauit: maioremque vim esse benedictionis, quam naturæ; quia benedictione etiam ipsa natura mutatur. Virgam tenebat Moyses, proiecit eam, & facta est serpens. Rursus apprehendit caudam serpentis, & in virgæ naturam reuertitur. Vides igitur prophetica gratia bis mutatam esse naturam, & serpentis et virgæ. Currebant Aegypti flumina puro aquarum meatu, subito de fontium venis sanguis cepit erumpere. Non erat potus in fluuiis, rursus ad prophetae voces cruor cessauit fluminū, aquarū naturam remeavit. Circumclusus undiq; erat populus Hebræorū, hinc Aegyptiis vallatus, inde mari clausus. Virgam leuauit Moyses, sepa-*
rauit

rauit se aqua. & in murorum speciem congelā-
 nit; atq; inter undas via pedestris apparuit.
 Iordanis retrorsum conuersus contra naturam
 in sui fontis reuertitur exordium. Nonne cla-
 ret naturam, vel maritimorum fluctuum, vel
 fluuialis cursus esse mutatam? Sitebat populus
 patrum, tetigit Moyses petram, & aqua de pe-
 tra fluxit. Nunquid non prater naturam ope-
 rata est gratia, ut aquam vomeret petra, quam
 non habebat natura? Marath fluuius amarissi-
 mus erat, ut sitiens populus bibere non posset.
 Misit lignum in aquam, & amaritudinem suam
 aquarum natura deposuit, quam infusa subito
 gratia temperauit. Sub Eliseo propheta vni ex
 filiis Prophetarum excussum est ferrum de secu-
 ri, & statim mersum est. Rogauit Eliseum, qui
 amiserat ferrum; misit etiam Eliseus lignum
 in aquam, & ferrum natauit, utiq; & hoc pre-
 ter naturam factum esse agnoscimus. Grauior est
 enim ferri species, quam aquarum liquor. Ad-
 uertimus igitur maioris esse virtutis gratiam,
 quam naturam, & adhuc tamen prophetica be-
 nedictionis numeramus gratiam? Quod sit an-
 tum humana valuit benedictio, ut naturam
 conuerteret, quid dicimus de ipsa consecratione
 diuina, ubi verba ipsa domini Saluatoris ope-
 rantur? Nam Sacramentum istud, quod accipis,

CHRI-

CHRISTI sermone conficitur. Quod sit tantum valuit sermo Eliae, ut ignem de calo deponeret, non valebit CHRISTI sermo, ut species mutet elementorum? de totius mundi operibus legisti; Quia ipse dixit, & facta sunt; ipse mandavit, & creata sunt; sermo ergo CHRISTI, qui potuit ex nihilo facere, quod non erat, non potest ea, quæ sunt, in id mutare, quod non erant? Non enim minus est novas rebus dare, quàm mutare naturas. Sed quoad argumentis utimur? suis utamur exemplis, incarnationisque astruamus mysterii veritatem. Nunquid naturæ usus præcessit, cum IESVS Dominus ex MARIA nasceretur? si ordinem querimus, viro nupta fœmina generare consuevit. Lique igitur, quod præter naturæ ordinem virgo generavit; & hoc, quod conficimus, corpus ex Virgine est. Quid hic queris naturæ ordinem in Christi corpore, cum præter naturam sit ipse Dominus IESVS partus ex Virgine? vera utiq; caro CHRISTI, quæ crucifixa, quæ sepulta est; verè ergo carnis illius sacramentum est. Ipse clamat Dominus IESVS, Hoc est corpus meum: ante benedictionem verborum cœlestium, alia species nominatur; post consecrationem, corpus CHRISTI significatur. Ipse dicit sanguinem suum. Ante consecrationem aliud dicitur; post

consecrationem sanguis nuncupatur. Et tu dicis, Amen, hoc est, verum est; quod os loquitur, mens interna fateatur, quod sermo sonat, affectus sentiat.

4. Ex his verbis Ambrosii colligo duo efficacia argumenta pro Catholicis, contra Lutheranos. Vnum est, quod Ambrosius loquatur de mutatione, qua ipsa natura panis mutatur. *Quantis, inquit, exemplis utimur, ut probemus non hoc esse, quod natura formauit; quia benedictione (Sacramentali) etiam ipsa natura (panis) mutatur.* Alterum est, quod conetur ostendere, huiusmodi mutationem, qua natura panis conuertitur in carnem Christi, non esse Deo impossibilem. Ostem d t autem generatim tripliciter. Primo, quia Deus potuit facere, ut naturæ rerum existerent, quæ antea non existerant: Ergo potest facere, ut postquam tam existunt, natura vnus mutetur in naturam alterius. Secundo, potuit facere, ut virga Moïsis mutaretur in serpentem, & iterum, serpens mutaretur in virgam, ita ut facta fuerit mutatio secundum naturam. (Hoc enim significant illa verba; *Vides, bis mutatam esse naturam, & serpentis, & virgæ.*) Cur non possit efficere, ut na-

ut natura panis mutetur in naturam carnis? Tertio, potuit multa alia facere, quæ supra naturam sunt, ut nimirum aquæ Ægypti mutarentur in sanguinem: ut aqua amara fieret dulcis: ut ferrum securis nataret super aquam: ut ignis de cælo descenderet: ut Christus nasceretur ex Virgine. Cur non possit efficere, ut substantia panis, supra naturam, mutetur in substantiam carnis?

5. Quid, obsecro, necesse erat, Ambrosium uti his argumentis & exemplis, quibus probaret naturas rerum à Deo mutari & transmutari posse, si nihil aliud voluisset ostendere, quàm fieri à Deo posse, ut panis, manente natura panis, à vulgari usu transferatur ad Sacramentalem, nulla facta mutatione substantiæ? Nihil profecto. Multo melius hoc ostendisset, exemplo sumpto à panibus propositionis, qui in veteri Testamento, sine vlla naturæ mutatione, à prophano ad sacrum usum deputati erant.

6. Cum Ambrosio sentiunt alii Patres. Cyrillus Hierosolymitanus catechesi 4. mystagogica; *Aquam, inquit, mutavit in*

vinum in Cana Galileæ sola voluntate; & non erit dignus, cui credatur, quod vinum in sanguinem transmutarit? Si enim ad nuptias corporeas inuitatus, stupendum miraculum operatus est; an non multo magis corpus & sanguinem suum, filiis sponsi dedisse illum confitebimur? quare omni cum certitudine, corpus & sanguinem Christi sumamus: nam sub specie panis datur tibi corpus, & sub specie vini datur tibi sanguis. Et infra; Qui videtur panis, non est panis, etiam si gustu ita appareat, sed corpus Christi: & quod videtur vinum, non est vinum, etiam si gustus id velit, sed sanguis Christi. Ex hoc testimonio sumo tria argumēta. Primum, Sicut Christus in Cana Galileæ mutauit aquam in vinum; sic in vltima cæna mutauit vinum in sanguinem. At aqua realiter & substantialiter mutata est in vinum: Ergo etiam vinum realiter & substantialiter mutatum est in sanguinem. Alterum; Si Christus in nuptiis corporeis, stupendo miraculo, conuertit aquam in vinum; magis stupendo miraculo, in conuiuio spiritali, mutauit vinum & panem in sanguinem & corpus suum. At non esset magis stupendum miraculum, imo ne miraculum quidem, si panem & vinum
non

non aliter mutasset, quam ex prophano usu ad sacrum transferendo. Quid enim miraculi fuit in panibus propositionis? Haftenus nemo agnouit. Tertium; Talis fuit illa conuersio panis in vltima cæna, vt post conuersionem non amplius esset panis, sed corpus CHRISRI: Ergo necesse est, naturam panis fuisse mutatam. Si enim mansisset natura panis, vtique mansisset panis. Et si mansisset panis, quomodo verum esset, quod ait Cyrillus; *Qui videtur panis, non est panis, sed corpus Christi?*

7. Audiamus & alios. Cyprianus sermone de cæna Domini; *Panis iste, inquit, non effigie, sed natura mutatus, Omnipotentia verbi, factus est caro.* Quid clarius? Panis, inquit, mutatus est. Qua vi & virtute? Omnipotentia verbi. Et quomodo mutatus? Non effigie, sed natura. Et in quid mutatus? in carnem Christi. *Factus est, inquit, caro.* Longè hæc distant à mutatione, quam Lutherani agnoscunt: ab illa, inquam, mutatione, qua non aliud fit, quàm quod panis, qui antea communi mensæ seruie-

bat, nunc ad sacram deputatus sit. Ad hoc enim non requiritur omnipotentia verbi; non mutatio naturæ; non conuersio in carnem Christi.

8. Hilarius lib. 8. de Trinitate; *De veritate carnis & sanguinis non est relictus ambigendi locus. Nunc enim & ipsius Domini professione, & fide nostra verè caro est, & verè sanguis est: & hæc accepta atque hausta id efficiunt, ut & nos in Christo, & Christus in nobis sit.* Hic explicat Hilarius terminum illius mutationis, quæ fit in Sacramento Eucharistiæ. Nec alium agnoscit, quàm verè carnem, & verè sanguinem. Quod breuissimè dixit Gregorius Nyssenus orat. catechetica capite 37. *Rectè nunc quoque credo, DEI verbo sanctificatum panem, in DEI verbi corpus transmutari.* Et hæc ipsa transmutatio est, quam nos Catholici profite-mur.

9. Pluribus testimoniis opus non est. Nam ea, quæ adduxi, tam clara & perspicua sunt, ut non nisi ab homine pertinaci ac impudente, eludi non possint. Nec tu aliter, Balduino, affirmare ausis, sat scio.

CAPVT VIII.

*An Ministri debeant tantum porrigere, non autem sumere
Eucharistiam?*

1. **H**Oc tu asseris, Balduine; Et nescio, an ullus ante te vnquam. Sic enim scribis pag. 261. *Ministrantes iubentur facere, quod CHRISTVS fecit. CHRISTVS autem non edit consecratum panem (hoc enim apud nullum Euangelistam legitur) sed distribuit panem & calicem omnibus suis communicantibus. Idem ergo & Discipuli facere iubentur; nimirum non edere panem consecratum, & bibere de calice benedicto, sed aliis vtranque speciem communicare.*

2. Verè dictum est, nihil esse tam absurdum, quod non inueniat authorem. An non absurdum est asserere, Apostolos, & alios Ministros, Apostolorum successores, iussos esse à Christo non sumere Eucharistiam, sed aliis duntaxat ministrare? Et tu tamen hoc asseris. Sed

& illud verè dictum est, oportere mendacem sui memorem esse. Hic peccasti, Balduine. Nam pag. 274. nihil de tuo mendacio cogitans, teipsum mendacii arguis, cùm ais; *Scimus utiq̃, Apostolis multa esse dicta, præsertim quæ munus ipsorum concernunt, quæ ad alios applicari non possunt. Interea tamen, & hoc verum est, unam esse apud DEVM rationem salutis ac iustificationis nostræ, eadem etiam media atque organa, eundem modum, tam quoad Apostolos, quàm quoad fideles. Idcirco, quemadmodum omnibus vigilantia atque cura opus est, ne à Diabolo circumuenti, gratia DEI, fide & salute excidant; ita omnibus æquè iisdem mediis opus est, quibus in fide confirmari, in pugna contra Diabolum animari, & ad salutem conseruari queant: inter quæ media non postremum est Eucharistiæ sacramentum. Quam ob causam non malè dictum illud, Quod vobis dico, omnibus dico, ad negotium sacramenti accommodatur.*

3. Quomodo poteras apertius teipsum iugulare? Antea sic ratiocinabaris; Apostoli & alii Ministri iubentur
facere,

facere, quod Christus fecit: At Christus non sumpsit Eucharistiam, sed tantum alijs porrexit: Ergo Apostoli & alij Ministri iubentur non sumere Eucharistiam, sed alijs duntaxat porrigere. Hic autem, tui planè immemor, sic concludis; Media salutis sunt omnibus æquè necessarià, tam Apostolis, quam alijs: atqui inter media salutis, præcipuum est Sacramentum Eucharistiæ: Ergo Sacramentum Eucharistiæ omnibus, tam Apostolis, quàm alijs, æquè necessarium est. Quomodo hæc conclusio cohæret cum priori? Hic colligis, sacramentum Eucharistiæ omnibus æquè necessarium esse, etiam Apostolis & Ministris. Ibi contra, Apostolos & Ministros, iussu Christi, arceri à perceptione Eucharistiæ. Abi cum tuis ineptiis.

CAPUT IX.

An Christus porrexerit Eucharistiam ante, an post lotionem pedum?

- I. **H**ic etiam noui aliquid sectatus es. Forte, ut verè sectarius haberi possis. Sic

sis. Sic enim habes pag. 309. *Scribit Becanus, Christum distribuisse Eucharistiam, lotis prius pedibus, quod falsum est: alias sequeretur, Iudam Ischariotem non interfuisse sacræ cænæ, quia post lotionem pedum, accepta offa, egressus scribitur, Ioannis 13. Diuus Lucas autem testatur, cum Christus sacram cœnam instituit, manum proditoris sui cum ipso fuisse in mensa.*

2. Ergo ex tua sententia, Christus lauit pedes Apostolorum post cœnam Eucharisticam; quod sic probas; Iudas interfuit cœnæ Eucharisticæ: At non interfuisset, si celebrata esset post lotionem pedum, quia post lotionem, accepta offa, egressus est. Miror tuam subtilitatem. Demus hoc, Iudam interfuisse. Demus etiam, post lotionem pedum, accepta offa, (vt tu loqueris) egressum esse. An hinc sequitur, statim post lotionem, nulla mora interposita, egressum esse? Neque tu affirmare hoc ausis. Nam si inter lotionem pedum, & egressum Iudæ, nihil moræ fuisset interpositum; quomodo offam accepisset post lotionem, ante egressum? Aut, si tantum erat temporis inter-

interiectum, ut offam sumeret; cur non etiam, ut Eucharistiam sumeret?

3. Sed clarius tecum agam. In ultima illa cœna, de qua agimus, multa contigerunt. 1. facta est cœna legalis, in qua agnus Paschalis comestus est. 2. cœna communis, in qua vsitati cibi appositi. 3. cœna Eucharistica, in qua corpus & sanguis Christi porrectus. 4. lotio pedum. 5. discessio Iudæ. 6. concio Christi, quæ apud Ioannem describitur. Nunc quæstio est, quo ordine hæc omnia gesta sint? quam video à doctissimis viris diligentissimè excussam esse. Sunt autem duæ potissimum sententiæ. Vna statuit hunc ordinem, ut 1. loco fuerit cœna legalis. 2. lotio pedum. 3. institutio Sacramenti. 4. cœna communis, in qua Christus dedit Iudæ buccellam panis. 5. discessio Iudæ. 6. concio Christi. Altera hunc statuit, ut 1. fuerit cœna legalis. 2. cœna communis. 3. lotio pedum. 4. institutio Sacramenti. 5. discessio Iudæ. 6. concio Christi. Vtraque ut magnos authores, ita magna argumenta habet. Nolim ego hic de toto ordine disputare: solum de lo-

de lotionem & institutionem Eucharistiæ inter nos contentio est. Et quidem si alterutram illarum sententiarum sequamur, res salua est. Ambæ enim lotionem pedum prius factam, ac deinde sacramentum institutum esse, confirmant. Quod & ego sentio, Balduine. Igitur ex hac parte, melior mea, quàm tua conditio est.

4. Deinde, si relieta autoritate (quæ tamemagni ponderis apud homines cordatos esse debet) vi argumentorum agamus, facile puto me euicturum. Tibi vnicum argumentum est, in quo vis nulla, vt paulo ante ostendi. Hæc mea sunt. Primum; Christus lauit pedes Discipulorum suorum, non modo vt exemplum humilitatis eis præberet; sed etiam, vt significaret, mundos esse oportere, qui corpus & sanguinem suum accepturi essent. Hæc autem munditia requiritur ante sumptionem Eucharistiæ: Ergo lotio pedum non est secuta Eucharistiam. Huc spectat illud Apostoli, 1. Corinth. II. 28. *Probet autem seipsum homo, & sic de pane illo edat, & de calice bibat. Qui enim manducat & bibit indignè, iudicium sibi manducat & bibit, non diiudicans corpus Domini. q. d. antequam acceditis*

ditis ad Eucharistiam, excutite & munda-
te conscientiam vestram, vt puri ac loti ac-
cedatis. Alioqui si immundi ac indigni ac-
ceditis, sicut Iudas fecit; iudicium vobis
manducatis & bibitis.

5. Alterum; Ex Euangelio Ioannis con-
stat, Christum seruasse hunc ordinem.
1. surrexisse à cœna. 2. lauisse pedes. 3. ite-
rum recubuisse. 4. dixisse Apostolis; *Vnus
ex vobis tradet me.* Sic enim scribit Ioannes;
*Surgit à cœna, & ponit vestimenta sua, & cum
accepisset linteam, pracinxit se, & cepit lauare
pedes Discipulorum.* Et infra. *Postquam ergo
lauit pedes eorum, & accepit vestimenta sua,
cùm recubuisset, dixit eis; Amen amen dico vo-
bis, quia vnus ex vobis tradet me.* Hinc ergo
constat, Christum post lotionem pedum,
iterum accubuisse cum duodecim Apo-
stolis, & dixisse, *Vnus ex vobis tradet me.* Ex
quo dupliciter te oppugno, Balduine. Pri-
mò, si post lotionem pedum, iterum accu-
buit, & dixit illa verba; ergo Iudas post lo-
tionem pedum non statim egressus est, vt
tu putas: sed cum aliis assedit mensæ. Po-
tuit ergò interea sumere Eucharistiam.
Secundò, hæc verba, *Vnus ex vobis tradet
me*, prolata sunt post lotionem pedum,
teste

teste Ioanne: & ex aliis Euangelistis constat, prolata esse ante cœnam Eucharisticam. Cùm ergo Ioannes & alij Euangelistæ non sint sibi contrarij, necesse est, cœnam Eucharisticam fuisse posteriorem lotionem pedum. Matthæus cap. 26 20. sic habet; *Vespere autem factò, discumbebat cum 12. Discipulis suis. Et edentibus illis dixit; Amen dico vobis, quia vnus vestrum me traditurus est. Et contristati valdè, ceperunt singuli dicere, Nunquid ego sum Domine? At ipse respondens ait; Qui intingit mecum manum in paropside, hic me tradet. Respondens autem Iudas, qui tradidit eum, dixit; Nunquid ego sum Rabbi? Ait illi, tu dixisti. Cœnantibus autem illis, accepit Iesus panem, & benedixit ac fregit, deditq; discipulis suis, & ait: Accipite & comedite: Hoc est corpus meum, &c. Aduerte hic Balduine. Post verba illa, *Vnus ex vobis me tradet*, sequitur institutio Sacramenti. Quod etiam habent Marcus & Lucas. Si ergo verba illa, secundum tres Euangelistas, prolata sunt ante cœnam Eucharisticam; & secundum Ioannem, post lotionem pedum: quis non clarè videt, lotionem pedum priorem fuisse cœna Eucharistica? Si*

iam

iam mecum sentis, gaudeo : sin minus, firmioribus argumentis instructus sis, necesse est.

CAPUT X.

An hoc Sacramento non tantum anima, sed & corpus reficiatur?

I. **D**Ixeram in mea Disputatione, hoc cibo Eucharistico refici ac nutriri animam; sicut cibo corporali reficitur ac nutritur corpus. Hoc tu reprehendis, tanquam malè à me positum: Et affirmas, non modo animam, sed etiam corpus refici ac nutriri hoc Sacramento. Sic enim habes pag. 202. *Quod soli anima spirituales refectioem tribuere videris, id verò falsum est. Nam mens instituentis fuit, ut & caro & anima reficiatur hoc sacramento. Et infra; Quemadmodum baptismus sanctificationem totius hominis, corporis ac animæ præstat: ita & cæna Domini, corporis ac animæ alimentum est. Ex quo fundamento Irenæus corporibus resurrectionem à mortuis promittit, &c.*

2. Sed

2. Sed primùm , immerito me reprehendis. Dixi quidem, animam nutriri hoc sacramento: non tamen dixi, solam animam nutriri. Hoc tu mihi affingis. Deinde, te ipsum iugulas. Nam sicut hic asseris, & carnem & animam pasci hoc Sacramento; ita paulò post contrarium scribis ex Hieronymo, pag. 278. his verbis: *Est enim esca animæ, non corporis.* Postremo, repugnastuis principiis. Nam vos Lutherani docetis, sacramenta non alio fine esse à Christo instituta, nisi excitandæ & alendæ fidei causa. At quid hoc ad nutriendum corpus?

3. Ut clarius te intelligam: quid obsecro est in sacramento, quod carnem reficit? an corpus & sanguis Christi, prout habent præsentiam naturalem, quam tu agnoscis? At sic immortalia & alterationis incapacia sunt, ut nutrimenti corporalis loco esse non possint. An prout habent præsentiam sacramentalem? At sic fidei duntaxat alendæ, ut vos dicitis, ex Christi institutione deseruiunt. An potius panis & vinum, quæ ex vestra sententia, manent cum corpore & sanguine Christi? At panis & vinum habent vim reficiendi corpus
ex na-

ex natura sua, non autem ex institutione Christi. At tu asseris, *mentem instituentis fuisse, vt caro reficiatur hoc sacramento*. Porro, quid ego de hac re sentiam, in scholasticis prælectionibus significatum est. Hic tuam contradictionem breuiter attigisse sufficiat.

CAPVT II.

An abstemiij possint sub vna specie communicare?

I. **N**ON damnas sententiam Brentii, qui id affirmat. Addis tamen consultius esse, vt integrè abstineant ab vtraque specie, quam vt vnā sine alia usurpent; eo quod totum fructum Eucharistiæ possint percipere sola fide, sine externa susceptione Sacramenti. Sic enim scribis pag. 231. *Brentius abstemijs vnā speciem concedit. Sed consilium hoc est, non præceptum*. Et infra, pag. 232. *Quidquid autem sit de consilio D. Brentij; optimum consilium est B. Lutheri, satius esse, abstemios prorsus abstinere à sacra cæna, quàm vna saltem*
D *specie*

specie uti. Interim tamen salutaris fructu sacramenti non carent, quo per fidem potiri possunt, etiam extra usum Sacramenti. Consolentur se baptismo suo, qui est stipulatio bonæ conscientie cum Deo.

2. Hic primùm consentis cum Brentio, abstemios posse sub vna specie communicare. Nunc velim soluas mihi hoc dilemma: Vel iure diuinò prohibitum est communicare sub vna specie, vel non est. Si prohibitum est, cur permittitur abstemiis? Si non est, cur reliquis negatur? Aut sanè illud: Usurpatio vnius speciei sine altera, vel est reuera sacrilegium & mutilatio sacramenti, vel non est. Si est, cur permittitur abstemiis? si non est, cur negatur aliis?

3. Præfers tamen consilium Lutheri, ut abstemii integrè abstineant. Causam addis, quia possunt per fidem potiri fructu Sacramenti. Porro fructus huius Sacramenti, secundum te, duplex est: alter, augere fidem; alter nutrire corpus. Si ergo abstemii sine sacramento possunt vtrumque fructum percipere per fidem: necesse est fidem ipsorum, quam habent, præsta-

præstare hunc duplicem effectum. 1. vt augeat seipsam. 2. vt nutriat corpus. At vbi docet hoc Scriptura? aut vnde habes hanc doctrinam? Deinde, si ita est, quæ potest esse necessitas huius Sacramenti? Cæteri fideles non sunt deterioris conditionis, quàm abstemii. Si ergo abstemii sine sacramento possunt omnia habere, quæ alii per Sacramentum habent; quid opus est vsurpare Sacramentum? Et si abstemii *consolantur se baptismo suo, qui est stipulatio bonæ conscientie cum Deo*; cur non alii eodem modo se consolentur? aut quid vltius quærunt, præter *stipulationem bonæ conscientie cum Deo*?

4. Hic reuocas mihi in mentem, quod supra ad initium notaui. Hoc, inquam, quod solitus sis, cum argumentis Catholicorum vrgeri te putas, prouocare ad conscientias tenerorum: & identidem illud occinere; *Sine vtraque specie, non satisfit tenerorum conscientijs*. Quomodo, mi Balduine, non satisfit? an non dixisti iam, baptismum esse stipulationem bonæ conscientie cum Deo? Solum baptismum sufficere ad consolandas & tranquil-

landas coram DEO conscientias? Si sufficit, quid opus est utraque specie? aut quis scrupulus conscientis reliquus esse potest, si per baptismum, stipulationem bonæ conscientiae cum DEO nactus es? Collige te melius.

Epilogus.

HÆc habui Balduino, quæ breuiter ac amice, non tam disceptare, quàm conferre tecum volui per epistolam. Accipies, opinor, in bonam partem: & non mea sponte, sed tuo potius impulsu, factum à me esse, interpreta-beris. Egissem fortè prolixius; sed quod initio monui, temporis angustia non patitur. Vix biduum absumus à Nundinis; & iam properat Typographus ad mercatum. Et probè tibi conscius es, libellum tuum (cui respondeo) vix lucem aspexisse, & certè iam primum ad hæc Nundinas proditurum. Igitur aut festinandum mihi fuit, aut responsio differenda. Hoc nolui, illud arripui. Quod autem in hac ipsa festinatione, parcius fortè, quàm argumen-ti ratio postulabat, de communionem sub utra-
que

*que specie differuerim, minimè mirum est Nam
quæ alias à me de hoc argumento disputata sunt,
non videntur tuis Notis magnoperè labefactata
esse, ac proinde noua defensione non egent. V-
num superest, Balduine. Aegrè tulisti (ut
colligo ex tuo libello) quod in mea Disputatio-
ne, Lutheranos cum Caluinistis coniunxerim,
quasi indignum ac probrosum sit, bonos viros
inter improbos annumerari. Fateor me id fecis-
se. Nego, eo consilio fecisse, quo tu interpreta-
ris, quasi sub exolo, ut tu loqueris, Caluini-
starum nomine Lutheranos diffamare cona-
tus sim. Non ita est. Ideo feci, quia in hoc pun-
cto de communione sub utraque specie, conspi-
rant Lutherani cum Caluinistis. Alias, non e-
ram sanè factururus. Scio enim, & iam palam
orbi Christiano notum est, vos extremè dete-
stari Caluinistas. Et cum ita sit, Balduine,
cur illis prætermisissis, me laceßere voluisti? Si
animus pugnandi tibi est, eos expugna, si po-
tes. Et certè potes, si vis. Monstruosa illorum
dogmata sunt, qua debellare, non magni la-
ris sit. In eo certamine deinceps te exerce. Si
tamen nolis, & mihi molestus esse pergas (quod
tibi integrum relinquo) à me vicissim plagam
expectare oportebit. Vale mi Balduine, & ad
verita-*

*veritatis semitam regredere: quod tibi, ta-
metſi erroribus anticipatis implicitus ſis, diffi-
cile futurum non exiſtimo, ſi diuina gratia
opem ac ſubſidium ſedulo imploraueris. Mo-
guntia, ex Archiepiſcopali Collegio*

noſtro, 2. Aprilis, anno

1610.

F I N I S.

